


70% dals Svizzers èn cunter in nov imni naziunal

L'inizianta duai perquai renunziar a la concorrenza per in nov imni

En ina lunga brev averta appellescha l'Uniu per il Psalm svizzer Widmer/Zwyssig a la Societad d'util public svizra, abrevià Sups (Schweizerische Gemeinnützige Gesellschaft/SGG) – presidiada da l'antierur secretari statal Jean-Daniel Gerber – da desister da sia concorrenza per in nov imni naziunal. Ed ella scriva: «La Societad d'util public svizra ha annunzià il 1. d'avust 2012 ina concorrenza per in nov text dal Psalm svizzer cun la motivaziun che l'existent saja linguisticamain serrà e da cuntegn antiquà. In text nov dessia dapi valita a l'imni ed al gidassia er a pli gronda acceptanza. Uschia vegnessia l'imni era chantà cun pli bler entusiassem. La melodia saja da midar be pauc u insumma betg. La finamira da l'inizianta saja da pudair introducir il text dal nov imni per la Festa naziunala 2015.

Oravant vulesse la Uniu per il Psalm svizzer tschentar ina dumonda da princip: Sut util public chapeschan ins atgnamain insatge che vegn renconuschì sco degn e necessari da promover. La Sups è



La gronda maioritad da la populaziun svizra è per mantegnair il Psalm svizzer sco imni naziunal, cumponi da pader Alberich Zwysig sin in text dal liberal turitgais Leonhard Widmer.


FOTOS MAD

in'impurtanta organisaziun social-politica che ha da sustegnair immanentamain quai che rinforza la coesiun naziunala. Danonder prenda la Sups il dretg – e quai senza ch'il minim basegn existia – da crear in nov imni naziunal, siond che l'existent vegnia purtà e sustegnì – tenor differentas retschertgas – d'ina gronda maioritad, da na main che prest 70 per schient dal pievel svizzer.

Gia l'atun 2012 ha la Sups annunzià ch'ins veglia instituir ina giuria naziunala. Mo la tschertga da commembers per quella è stada bler pli stentusa che spetgà. Bleras personalitads han dà chanaster cun la motivaziun ch'il Psalm svizzer saja dentant acceptà vastamain. I saja er in sfurzim per tut pretsch e sunter che tschintg emprovas (concorrenzas) e numerusas intervenziuns hajan fatg naufragi era na necessari.

Singulas gasettas svizras èn sa fatschentadas cun il tema. Tar enquistas online èn duas terzas stadas encunter. Atgnamain in cler e depriment verdict per la Sups. L'imni naziunal è relativamain giuven ed uffizial pir dapi bun 30 onns.

In fatal sbagl da comunicaziun dal pledader da la Sups, a l'entschatta da 2013, ha schizunt laschà supponer ch'il nov imni saja gia en il truclet da la Sups. «Nus avain gia in fitg, fitg bun text, ch'è da prender zunt serius, che nus tegnain dentant sut clav.» A la fin da fanadur 2013 ha la Sups stuì dementir. Autramain fiss la concorrenza daventada be pli ina farsa.



Dapi il zercladur da quest onn è l'exgesuit Lukas Niederberger mainafatschenta da la Sups e manader dal project «CHymne». Malgrà ils resultats d'enquistas e tschients commentaris negativs insista la Sups il 1. d'avust danovamain sin ses plan da realisar in imni naziunal. En la gasetta «Schweiz am Sonntag» disfamescha Niederberger a moda turpegiusa il Psalm svizzer e na lascha zunt nagin dubi ch'el vulessia il pli gugent era midar la melodia.

Quel spretsch e tala sentenza per l'ovra ecumenica da Leonhard Widmer (text) e pader Alberich Zwysig (melodia) tras il spiritual Lukas Niederberger – el era la finala in cunfrar dal cumponist pader Alberich Zwysig – è in vair affrunt visavi blers Svizzers e per catolics cartents ina provocaziun ed offensiu. Ins sto perquai vairamain sa dumandar sch'in antierur commember da la Societad (Cumpagnia) da Jesus (SJ) è cun ina tala aversiun vers il Psalm svizzer insumma purtabel ed acceptabel sco manader d'in tal project.

Las reacziuns en las medias èn stadas lezza giada plitost reservadas e l'interess pitschen. Ins pudess dir: Paucs sbragian e prest nagin che reagescha. Las fadias da la Sups da gudagnar la pressa, era quella da l'exteriur, per ses plan èn resumadas sut il titel «Svizzers vulan in nov imni naziunal». I vegn dentant taschentà da dir quants Svizzers che quai èn. Ina gronda maioritad è numnadamain encunter.

En in'emissiun al radio SRF1 dals 2 da december ha già Lukas Niederberger

duas uras temp da far reclama per ses project. Danovamain disfamescha el l'Imni svizzer e fa ina lala cun l'entschatta da quel en in tempo insupportablament plaun. Er il team dals moderaturs dal radio contribueschan umiliantamain cun na laschar betg in sulet bun fil vi dal Psalm. – Da la lunga intervista per telefon cun la cuntrapartida (Uniu per il Psalm) èsi vegnì emess sulet durant trais minutas. E tuttina èn a la fin da l'emissiun duas terzas dal public stadas cunter il plan da la Sups. Per nus èsi pli che cler: Igl è da far fin a la concorrenza.

A la fin da november 2013 èsi reussì als iniziants da furmar – sunter lungas fadias – ina giuria e da preschentar ils 3 da december tar ina conferenza da pressa a Berna in comité parzial per la giuria.

Da l'oriunda data uffiziala, d'introducir il nov imni il 1. d'avust 2015, n'è stà d'udir nagut pli. Per il commember da la Rumantschia en il presidi da la giuria, Oscar Knapp, «tuna l'imni sco ina prognosa da l'aura, pachetada en in psalm». Quella constataziun senza tact e religiosamain prest offendenta è vegnida critigada fitg en la pressa rumantscha e refusada. Pierre Kohler, commember da la Romandia en il presidi da la giuria, ha taxà il text sco naiv ed antiquà e che nagin enconuschia. Quest giudicat tras in politicher cristiandemocrat dal Giura n'ha chattà nagina chapientscha e be disgust.

La Sups scriva en ses reglament da concorrenza ch'il team dal project ed il presidi da la giuria sajan da tut temp libers da senz'ater renunziar a la concorrenza.

La Societad dals fautors dal Psalm svizzer supplitgescha perquai la Sups da far adiever da quella pussaivladad ed era da sa perstgisar per las turpegiusas remartgas davart il Psalm svizzer. Perencunter duess ella sa fatschentar da l'istorgia ed il svilup da l'imni naziunal cun era mussar al pievel il caracter ecumenic e l'eradiaziun paschaivla da quel. Quai fiss in pensum per propi da la Sups enstagl da lantschar in project ch'effectuass tut auter che quai ch'ella dat da crair cun sia finamira da «solidaritad en la societad civila svizra» ed «integraziun da tuttas gruppas da la populaziun» – e che chaschunass onns ora be dispitas.

Per l'Uniu Psalm svizzer:
Hubert Spörri

Mo fatg legher

En la «Weltwoche» nr. 50 ha Urs Paul Engeler (era enconuschent en la Rumantschia) prendì claramain posiziun cunter il plan da la Sups da vulair realisar in nov imni naziunal. Ordlonder be insaquant passadis.

«Per glied cun umor era i bizar. Per carstgauns, che prendan serius enqual chaussa, èsi stà piter. En ina saletta a Berna han in antierur secretari statal, in exgesuit en chautschas violetas, in vegl diplomat da finanzas ord l'Engiadina ed in antierur cusseglier naziunal da la pcd ord il Giura mo ridiculissà l'Imni naziunal svizzer existent.

Quel legher quartet da la Sups, che ha ina facultad da 78 milliuns francs e che na sa betg tge far, ha stuì disfamar l'existent Psalm svizzer per pudair giustifitgar ses project, lantschà sut il titel 'CHymne'. Da quest'acziun èsi da spitgar nagut bun.»